




BOSNA I HERCEGOVINA
VIJEĆE MINISTARA
Generalno tajništvo

Broj: 05-50-1-3736/12
Sarajevo, 26.3.2013. godine



PARLAMENTARNA SKUPŠTINA BiH

- Zastupnički dom -

SARAJEVO

PREDMET: Odgovor na zastupničko pitanje – dostavlja se

Vijeće ministara Bosne i Hercegovine, na 43. sjednici održanoj 26.3.2013. godine, dalo je suglasnost na Odgovor na pitanje koje je postavila Nermina Čemalović, poslanica u Zastupničkom domu Parlamentarne skupštine Bosne i Hercegovine, a kojeg je utvrdilo Ministarstvo civilnih poslova Bosne i Hercegovine.

U pritvku prosljeđujemo Odgovor radi njegovog dostavljanja zastupnici.

S poštovanjem,


GENERALNI TAJNIK
Zvonimir Kutleša




**BOSNA I HERCEGOVINA
VIJEĆE MINISTARA**

Broj: 05-50-1-3736/12
Sarajevo, 26.3.2013. godine

Nermina Ćemalović, poslanica u Predstavničkom domu Parlamentarne skupštine Bosne i Hercegovine, na 39. sjednici Predstavničkog doma, održanoj 18. decembra 2012. godine, postavila je sljedeće poslaničko pitanje:

„Dokle je došla priprema Zakona o transplantaciji organa i donatorstvu u BiH i da li je uopšte u pripremi?“ uz obrazloženje: „Prije 6 mjeseci sam uputila Inicijativu o donošenju navedenog Zakona i potrebi uključivanja BiH u donatorsku mrežu „Eurotransplant“ a što je u interesu svih građana BiH.“

Na postavljeno pitanje, Ministarstvo civilnih poslova je utvrdilo sljedeći

ODGOVOR

Zakonom o ministarstvima i drugim organima uprave Bosne i Hercegovine (“Službeni glasnik BiH”, br.: 5/03, 42/03, 26/04, 42/04, 45/06 i 88/07, 35/09, 59/09 i 103/09), definisana je koordinirajuća uloga Ministarstva civilnih poslova Bosne i Hercegovine u oblasti zdravstva. Prema odredbama stava (2) člana 15. Zakona o ministarstvima i drugim organima uprave Bosne i Hercegovine, Ministarstvo civilnih poslova je nadležno za obavljanje poslova i izvršavanje zadataka koji su u nadležnosti Bosne i Hercegovine i koji se odnose na utvrđivanje osnovnih principa koordiniranja aktivnosti, usklađivanja planova entitetskih tijela vlasti i definisanje strategije na međunarodnom planu, pored ostalog, i u oblasti zdravstva.

Kao i ostali segmenti zdravstva, oblast transplantacije u Bosni i Hercegovini je regulisana na nivou entiteta:

- *Zakon o transplantaciji ljudskih organa (Službeni glasnik Republike Srpske 14/10) i*
- *Zakon o transplantaciji organa i tkiva u svrhu liječenja (Službene novine Federacije BiH 75/09).*

Pored toga, u oba entiteta su doneseni značajni podzakonski akti koji regulišu pojedine segmente transplantacijske medicine:

- *Pravilnik o medicinskim kriterijima, načinu, postupku i vremenu utvrđivanja moždane smrti osoba čiji se dijelovi tijela mogu presađivati u svrhu liječenja (Službene novine FBiH 61/04),*

- *Pravilnik o uslovima i postupku verifikacija za zdravstvenu ustanovu koja obavlja djelatnost transplantacije ili djelatnost uzimanja ljudskih organa (Službeni glasnik RS 33/10, a u pripremi su i neki drugi pravilnici.*

Imajući u vidu da je Konferencija ministara za oblast zdravstva u Bosni i Hercegovini 2009. godine inicirala osnivanje Radne grupe za izradu Plana pristupanja Bosne i Hercegovine Eurotransplantu, da je u martu 2012. godine kroz Parlamentarnu skupštinu BiH, kroz poslaničko pitanje, pokrenuta inicijativa za donošenje Zakona o transplantaciji na nivou BiH, te da je ovo drugo po redu pitanje zastupnice

Parlamentarne skupštine BiH gđe. Nermine Čemalović vezano za status pripreme Zakona o transplantaciji na nivou BiH, kao i da se Generalnom sekretarijatu Vijeća ministara Bosne i Hercegovine obratilo Udruženje građana invalidnih lica - hroničnih bubrežnih bolesnika Zeničko – dobojskog kantona sa istom inicijativom, Ministarstvo civilnih poslova BiH je, u skladu sa svojim nadležnostima, ponovo zatražilo mišljenja nadležnih ministarstava za oblast zdravstva Federacije Bosne i Hercegovine i Republike Srpske, kao i Odjela za zdravstvo i ostale usluge Brčko distrikta BiH.

Svojim aktom broj 02-37-181/13 od 18.01.2013. godine Federalno ministarstvo zdravstva je, uzimajući u obzir sve činjenice navedene gore, ukazalo na neophodnost da se aktivnosti vezane za transplantaciju organa i tkiva podignu na nivo države, i s tim u vezi podržalo inicijativu da se na nivou Bosne i Hercegovine donese jedinstveni zakon o transplantaciji organa i tkiva, o čemu su i ranije iznijeli svoj stav na Konferenciji ministara za oblast zdravstva u BiH. Federalno ministarstvo zdravstva je spremno podržati naredne aktivnosti Ministarstva civilnih poslova da se planiraju i koordiniraju dalje aktivnosti kako bi Bosna i Hercegovina na adekvatan način odgovorila apelima za pomoć velikog broja oboljelih koji čekaju na transplantaciju organa.

Federalno ministarstvo zdravstva je također informisalo da, kroz direktnu saradnju sa Ministarstvom zdravlja i socijalne skrbi Republike Hrvatske, kao i kroz predstavnika Federalnog ministarstva zdravstva za transplantaciju organa, aktivno učestvuje u radu Regionalnog razvojnog centra za transplantacijsku medicinu Hrvatska (RHDC) za zemlje jugoistočne Evrope od njegovog osnivanja u februaru 2011. godine. U okviru navedene regionalne mreže do sada je održano pet regionalnih sastanaka i značajan broj stručnih radionica, na kojima su učestvovali predstavnici ministarstava zdravlja zemalja jugoistočne Evrope i medicinski stručnjaci koji su u svojim zemljama uključeni u aktivnosti na polju donacije i transplantacije organa. Značajan je naglasak ovih aktivnosti da je napredak i uspjeh u procesu donacije i transplantacije moguć samo ako se razvije održiva saradnja u jugoistočnoj Evropi.

Odjel za zdravstvo i ostale usluge Brčko distrikta BiH je svojim aktom broj 05-0070BF-02/13 od 16.01.2013. godine dostavio saglasnost i pozdravio inicijativu za donošenje zakona o transplantaciji na nivou Bosne i Hercegovine.

Ministarstvo zdravlja i socijalne zaštite Republike Srpske je svojim aktom broj 11/04-500-13/13 od 01.02.2013. godine informisalo da je Narodna skupština Republike Srpske donijela Zakon o transplantaciji ljudskih organa (Službeni glasnik Republike Srpske 14/10) te da ne može prihvatiti inicijativu za donošenje Zakona o transplantaciji organa na nivou Bosne i Hercegovine.

Kao što smo naveli i u našem prethodnom odgovoru na poslaničko pitanje gđe Nermine Čemalović, Konferencija ministara za oblast zdravstva u Bosni i Hercegovini je na svom 9. sastanku održanom 06.07.2010. godine u Banjaluci razmatrala pitanja vezana za inicijativu za pristupanje Bosne i Hercegovine Eurotransplantu i donijela zaključak da se formira Radna grupa za izradu Plana pristupanja Bosne i Hercegovine Eurotransplantu (ET). Nakon uspostavljanja Radne grupe (čiji su članovi imenovani od strane Ministarstva civilnih poslova BiH, Federalnog ministarstva zdravstva, Ministarstva zdravlja i socijalne zaštite Republike Srpske i Odjela za zdravstvo i ostale usluge Brčko distrikta Bosne i Hercegovine) u

februaru 2011.g, svim članovima su na razmatranje dostavljeni dokumenti sa informacijama o preduslovima koje ET postavlja pred nove zemlje članice. Radna grupa je razmatrala niz otvorenih pitanja na koje je neophodno odgovoriti i koraka koje treba napraviti da bi se uopće moglo na kvalitetan način početi govoriti o aktivnostima BiH za pokretanje procedure pristupanja u ET. Prije nego što postane član ET zajednice, zemlja mora ispuniti niz preduvjeta u području doniranja organa i transplantacije uključujući između ostalog i zakonodavni okvir, jasan sistem upravljanja i koordinacije, medicinska znanja, finansijska potpora i dr. Neophodna su jedinstvena zakonska rješenja, između ostalog i za akreditaciju transplantacijskih centara, sigurnost i zaštitu podataka, prikupljanje i distribuciju podataka nakon transplantacija u cilju poboljšanja raspodjele organa, za razmjenu organa sa ET partnerskim zemljama na temelju zajednički dogovorenih ET načela raspodjele i sl. Pored toga, stopa doniranja organa u trenutku punopravnog članstva mora biti iznad 10 na milion stanovnika, a BiH je daleko ispod tog nivoa.

Na osnovu svega navedenog Radna grupa je iznijela stav da se ovoj tematici treba pristupiti na ozbiljan i sistematičan način te je prije svega neophodno:

- zvanična saglasnost i spremnost svih nadležnih institucija u BiH da se uđe u proces pristupanja ET-u, obzirom da članice Eurotransplanta mogu biti samo države;
- uspostaviti zvaničnu komunikaciju BiH na državnom nivou (nivo ministara) sa ET radi definisanja pisma namjere i daljih koraka;
- na način kako je to rađeno u susjednim zemljama (Hrvatska, Srbija, Makedonija, Slovenija, Crna Gora i dr) uspostaviti jedinstvenu strukturu na nivou države za razvoj transplantacijske medicine u BiH, koji će biti nadležan za provođenje aktivnosti vezanih za pristupanje i članstvo u ET, izradu situacione analize u BiH, pripremu strateških i pravnih dokumenta usaglašenih sa EU direktivama u ovoj oblasti, unutrašnju koordinaciju i dr.

Izneseni stavovi i predložene mjere trenutno su na razmatranju od strane novoimenovanog člana Radne grupe ispred Ministarstva zdravlja i socijalne zaštite Republike Srpske, nakon čega se očekuje da Radna grupa uputi svoje zaključke naprema Konferenciji ministara za oblast zdravstva u BiH na dalje razmatranje.

Imajući u vidu svu kompleksnost pitanja i procesa vezanih za oblast doniranja organa i transplantacije generalno, kao i složenost zdravstvenog sistema u Bosni i Hercegovini, Ministarstvo civilnih poslova BiH, će nastaviti, zajedno sa zdravstvenim vlastima u BiH, započete aktivnosti na daljim razgovorima ka iznalaženju konačnog rješenja.

* * *

Vijeće ministara Bosne i Hercegovine, na 43. sjednici održanoj 26.3.2013. godine, dalo je saglasnost na Odgovor na pitanje koje je postavila Nermina Čemalović, poslanica u Predstavničkom domu Parlamentarne skupštine Bosne i Hercegovine, a kojeg je utvrdilo Ministarstvo civilnih poslova.

Broj: 05-50-1-3736/12
26.3.2013. godine
S a r a j e v o